

我在英倫身兼數職的日子

作者: opm一拳超人

Powered by [紙言](#)

第一章: Begin!

先介紹我自己，我叫呀鈍，英文名Ton, 好多人叫錯我做Tom, 外國畢業回來香港自第一份工起就做data analytics, 做左十幾年升到上manager, 人工還可以, 好彩08海嘯前已自置物業, 但呢啲都唔係重點, 重點在2019年除左香港既改變, 仲係我人生既改變, 在此之前得知居英權可以舉家移民後就開展左我移民英倫既計劃, 三軍未動糧草先行, 第一步當然係賣自住樓, 在樓市仲gogogo既年代有幸都賣到過千, 有了資本就隻身飛過去英倫睇樓, 飛去三日兩夜已成功搵到樓落左offer, 重點係人生第一次可以full pay 買樓, 呀唔係樓, 係屋, 一間過千尺既屋仔輕鬆拿下, 咁就開展我英倫之路

下一章, 落腳settle 到第一份工

第二章: 落腳settle 至搵到第一份工

2020年當香港人人開始帶口罩既時候我就準備舉家移民，有人會話留返層樓唔賣收租唔好咩？我就覺得要take side, 做騎牆派二五仔唔會有好結果，所以一毛不剩咁離開先叫移民。此外，你看好日後美麗新香港就唔會走啦，走得就自然覺得其他地方比較好，咁仲留資產在一個你看淡既地方其實好矛盾，股票又好不動產也都要走，以後回來都只會係旅行嘅過客。

又會有好多人問點解選擇英倫而唔係老美澳加，呢點都好多人成日會問，首先老美做IT 人工最高，但醫療同小朋友返學全部自費，後生無病無痛還好，有事上黎就麻煩，當你遇到親人五張幾就被醫生放棄治療，而原因係因為太老唔醫，你就唔會選老美，都已經唔講咩槍械校園呢啲嘢。另外澳加單睇每年既GDP 同市場既類型，世界排名十幾，同英美無得比，加上香港最類似既金融專業服務型經濟在倫敦，所以英國先係首選（其實係我無選擇...）。雖側你未必係做相關行業，但週邊發展既行業相類似既一定係倫敦，澳洲鑛產和農產行業，香港人識條鐵，相關行業一定缺乏經驗，至於話到時做倉做食肆sales, 咁就不在此考慮，因為度度都係最低工資無野好比較。

講返到步後在英倫遇到既第一件事就係全國封城，留在屋企咩都做唔到，但我都唔急於搵工，要安頓好晒一家人再加上英國既效率，3-4 個月閒閒地，直到移英第六個月就開始搵工，當初好似所有人介紹一樣搵indeed, 以為好似香港既Jobsdb, 點知係南華早報一樣，全部都係濕9工，做support，consultant 搵笨就多，最後我更新執靚左LinkedIn後有一個job agent 搵，佢個subject 仲要係 we do data，就咁樣成功安排到第一次interview, title 係data engineer, 講真我在香港未做過engineer，大部分公司都無呢個title, analyst 就多，我估大概都係比較technical掛。

講到呢度我又想講下人在外地既定位，在香港做IT 除咗被人當做狗之外，所有人包括HR 都覺得，你未做到manager 叫唔到呢個人工，所以人人都搶住上位，粗粗地PM都係manager。坦白講Manager 既定位係facilitate 成team 人，對上對下都好你溝通唔夠好難做到，簡單啲講你英文系畢業都唔會夠呢度訓街既英文好，所以由此開始返去做多啲technical 做code 狗毒L 唔出聲，也許會係呢度生存之道。

第三章: Interview 到返工

第一次interview 安排在家視像，本身自問外國畢業，專長唔止寫code，係相比之下英文溝通到但又有technical background, 簡單來講就係湊鬼頭老闆，在香港要搵一個英文好又做開technical 既人係比較難，technical 寫code 好勁但唔溝通的大把，世界仔單係吹水唔做嘢無料也好多，但要英文好又做technical 既就比較少，所以我做開外資公司，英文溝通方面相信無問題，事實上見工過程同香港都真係無咩分別，我都好順利通過左。

之後第二次就係technical test, 我都係第一次網上憑空寫SQL 做test, 好彩多年經驗單係寫在張白紙上點都寫到既，之後當然都過關啦，就係咁我就成功有左在英國第一份工既offer, 人工年薪係稅前我香港份糧既一半，屬於散仔level, 不過第一份工就無咩要求啦，但求拿本地工作經驗都好。

在此見工期間有段小插曲，另外有一個agent 同一時期都有搵我但操一口普通話。難道係祖國叫我回家既訊號？

心驚之下原來見的公司是金絲雀碼頭既上海咩咩銀行，我在香港都做過銀行IT部，似乎都有啲相關經驗，而且係世界第二大金融中心區Canary Wharf 喎，出入都一定靚過返中環啦，曾經都有心動一刻，去到final round既時候我想深一層其實我要逃避既野無謂自己又入返去，加上老婆反對，當時又話環制裁，我怕因為接觸銀行敏感資料會有麻煩，返工事小，影響全家移民事大，所以最後兩個offer 我係反常地take 人工少那個，那份工除咗係我第一份英倫工，仲要係我第一份全程在家工作既工，跟得鬼頭老細多都知objective oriented, 只要交到功課其他野唔會理，什或是你訓覺都無人會理，宜家仲要寫在contract 上full remote, 咁咪好正？

第四章: 開工實戰到出糧

由Take 左offer到部公司電腦送到屋企用左一星期，從此就開始我在家既工作，工作類型同性質同我早年在香港做散仔既時候差唔多，都係做development 野比較多，寫下sql query 咁，

在外資公司對既同事全部係鬼佬其實都已經慣晒，

心想幾容易適應啲同香港無咩分別改變唔多，放工香港有時都仲要去happy hour 應酬下，宜家在家工作人都唔使見，專心做毒L！

由其是當我知道英倫公共交通費好貴，坐兩個站地鐵最低消費係£3.5一程，

閒閒地坐轉火車都十幾鎊，呢度都慳唔少車錢同時間。硬要講生活有咩改變，當然係屋企大左成倍，兩公婆一人一部Benz(呢度歐洲車同日本車同年份同車款同價，唔係唔買雙B

下話？) 子女返學都無問題，最緊要係唔會有香港人(利申：

我選擇既地方當時2020年真係99.9%白人，學校真係無一個香港人) 點解要咁要求？

因為我唔想好似90年代移民加拿大嘅親戚子女一樣，全部圍爐，結果係中文好過英文，

讀左等於無讀，由於英文唔可以native, 當地發展自然一般，回流香港反而係最勁英文那班人，

就正正因為回流香港比到佢哋工作，機會，事業，家庭，所以回流既人大多支持政府，

反正有咩事可以即走！我唔想子女重搵復轍，第一件事就係唔可以圍爐！2020年雖然有Covid 封城，但當時無人爭樓爭學位好輕鬆！對比宜家樓同學位全爆，宜家過嚟就比較辛苦啦。

講返出糧，第一個月無風無浪，只係同我直屬上司同期入職，其實當時我都覺得麻麻地，

因為經驗所得，上司下屬同期入職而下屬唔係佢請，通常都唔多like, 就係呢點就埋下之後既伏筆。

當收到第一份糧時真係感覺好少，原來呢度出糧之前已經扣左稅，

基本上公司幫你報埋稅而且出糧之時會即，連埋NI (國民保險) + pension,

第一份糧就比左事頭婆差唔多4 成，

所以我第一份糧所得應該係我香港份糧大約一半再一半既人工，

真係少到單係應付日常開支唔使交租都唔多得，哎，唔通呢世就豆份咁既糧？

第五章: 機會處處 但又危機四伏

工作無風無浪，上司係一個full stack 一腳踢既人，好處係可以幫手做，唔好處係咩都識無得走雞。而且要求都幾高，成間公司得我一個華人，有一次條team 約過出嚟聚下見下面，我先知條team 有4 個人，一個黑人，其餘都係本地人，佢哋返工放飯只有半個鐘，都好興出去公園草地坐係度食三文治，咁當時正值炎夏，日照又長，坐正喺草地同佢哋吹左一個鐘，已經成身紅晒，反而見到佢哋，白人晒唔黑，黑人唔會再黑，得我一個晒到又紅又黑...

因為份糧真係唔夠開支，所以我都keep 住搵工，呢度job agent 真係經 LinkedIn 搵我比較有效率，有interview 既機會都好大，當中有個interview 叫我去北部城市見工，有得做返data manager, 而且係我在香港最後一份工屬同一工種，樣樣都好似好類近，個agent 仲話我會好喜歡那公司既culture, 我當時曾經有一刻心動，但要求去北部城市返工，我揸車一程都要三個鐘，來回六個鐘點返？黎生都怕返唔到啦掛，反正我有份工返緊又在家工作（其實就係已經懶開，所謂試過返唔到轉頭），所以當時就直接拒絕左去見。

講返工作，我開始發覺上司對我多左意見，要求高之餘仲好高效率，我不禁心想說好的work life balance 呢？又話英國人效率好慢？點解我呢件上司咁高效？我以香港人既效率黎做都開始感到有壓力，如是者又過咗兩個月，我開始頂唔順佢咁高既要求但仲要凡事親力親為，曾經一刻我有一絲閃過念頭係咪因為我唔係佢請所以咁樣只對我要求高呢？我之後偷睇佢LinkedIn, 頂 劍橋畢業？另外一個身份係Accountant？佢玩晒啦咁！所以之後我都心甘情願被佢micro management 一番。

題外話，講開職場遇到既上司，我在香港都遇到過一個super bossy 既中年女人，做得女人管data team 都唔方識technical 啦，咁tech 呢方面可以耍走佢，佢cv 都可能係大家同行一路走黎既路，先係analyst, 再上PM, PM 都係M, 就憑佢一個M 就過檔管data team, 咁其實PM 範疇好大，管得好一個project(秘書工作範圍) 唔代表佢識DA, 識唔識都算，但佢d micro management 好煩之餘仲要綯花，曾經在一個鐘前要present 比大老闆前改template, 為既只係綯花靚d, 但結果係明明一直行得走得但你一改佢就唔行得，一個鐘內要改好仲要試，咁當然係唔work 啦，最弊係佢會將自己既個人情緒全部發洩係你身上，佢會發癲鬧人，佢會一朝早西面，呢啲上司都真係經典，人生遇到過一次已經算多，當時坐我隔離位既法國仔仲問我係咪香港d boss 都係咁樣樣？我要花好幾日去解釋比佢聽唔關地方事，係人既問題...我怕佢從此驚左香港，香港其實仲有好多好老細（包括我自己XD），我好多年前其實都已經說好香港的故事啦。

再題外話，呢間外資公司我做咗唔係好長，公司一半以上都係鬼佬，但因為呢間公司令我有信心可以在外地立足，而呢個法國仔成左我之後既好朋友，之前我在倫敦都同佢見過面，之後會再講。

雖然呢間公司一半以上都係鬼佬，但我都發現有歧視現象，事緣我近鬼佬堆成日出去食lunch 都會同佢哋食（當時成百蚊個lunch 覺得都幾貴）有次有個北歐人（198高），成個雷神咁樣，佢話比人歧視，佢做marketing analysis 既，佢條team 除咗佢全部都係港女，你以為一定受歡迎等食洋腸啦？錯，佢向我投訴話開會時班港女全程用廣東話傾，當佢無到之餘仲好唔尊重，我立刻話咁樣係歧視要同HR 反映，講真就算傾間偈有個外國人在場都好應該全英文，香港人同香港人傾都唔該用英文，呢啲叫尊重！順帶一提同樣情況英國呢邊都一樣有發生，包括學校，職場或者隔離鄰舍，同場有外國人（其實我哋先係外國人），請尊重返人地，講英文啦。

講多一句，我那個好bossy 既女人都貪食洋腸，但就target 間公司既MD, 人哋有女友都成日send message 比佢話佢係我上司個mentor, 又約佢游水咁，不過都係道聽塗說，再多就驚穿。

第六章：敗走英倫重新出發，讓我走得更遠

無風無浪既日子好快過完，上司對我既要求同效率愈來愈高，在香港身經百戰既效率下都感到有壓力，加上份糧入不敷支既情況下，雖則無財政上既壓力但每月都負數既感覺不太好，在呢短短幾個月期間都有搵工，所謂來者不拒，有得見就去見下工，儲下經驗值，反正都係網上見工對我係零成本。同香港一樣做緊一份工去搵另一份，會比較多人搵，有本地工作經驗點都有說服力啲，況且2020年仲未有咁多香港人過嚟，加上脫歐人才短缺，雖然無話咩搶人才但真係可以日日都有工見。當中全部interview都失敗，大部分都過到去2nd round final round 先失敗，我見我上司劍橋出身咁鬼勁，那邊又多初創科研，咁就劍指去劍橋工作啦，所謂地靈人傑，當地又多國際學生，能夠致身世界五大既學府，出入下都感到型過人，一心要入劍橋做嘢既情況下曾經有兩次機會到final round, 都係去到臨埋門一腳波既情況下失敗告終，我當時真係有啲失望，係咪歧視呀...就係呢個時刻之前有個agent 又再打俾我，同樣係北部城市既office, 不過今次係做散仔職位，我心諗之前做呀頭都唔去見無理由做散仔去下話，加上咁鬼遠點返工？當我姓黎？個agent 搵過我幾次，我又唔識拒絕人，加上當時滑鐵盧左兩次後失望情緒高漲，想搵個機會比自己贏返信心，當羅多啲見工經驗都好，所以就用三個鐘揸車北上睇吓間公司咁料，又睇吓請咗個咩呀頭做之前叫我in 那個位都好。拿！來回六個鐘車程去見一份工，誠意可加吧！結果係出人意表。

揸三個鐘真係唔野小，揸得快要長時間集中精神會好累，揸得慢真係天黑都未到，喜歡揸車特登都會出去吹吹風既人，相信試過長時期揸長途車返工後會討厭揸車，雖然我自大學起已經日日揸車返學，經驗豐富，但我唔好車也唔鐘意揸車，經過長途揸車既日子後，我就自此之後連任何賽車game, 小型go Kart 車什至碰碰車都不了，好厭倦。講返見工既過程好順利，我終於知道之前agent 話我一定鐘意間公司culture, 原來呀頭都係香港人，公司個事頭婆係台灣人，平時工作都要同台灣分公司溝通，所以工作要求都要識國語，咁見完工我覺得感覺唔錯，感覺個呀頭夾得埋，香港人既上司，工作環境，公司業務性質，樣樣都無問題，加上現在份工比到我一種被歧視既感覺，咁我有得跳槽又有得圍爐下洗滌下心靈都係一種辦法，最緊要同台灣交手又唔係同偉大祖國，咁同我宗旨無抵觸呀，雖然公司係好遠，但大老細比我hybrid 一星期返三日，又比我任開年薪，仲話有analyst 同engineer 位任我選黎做，咁誠意拳拳我就當仁不讓啦，從此我就轉戰北部戰區！

第七章：北部戰區圍爐日子，身很累但過得快樂

成功收到offer後就resign 現在那份工，由於全程work from home, 電腦都寄返公司就得，休息一星期後，期間買多部車比我揸上北部返工，從此我要挑戰日揸六個鐘既職業司機生涯（轉左行咁）。職位又係engineer, 老細話既然你上份工都係呢個title, 試吓啦。從此我就由sql 轉寫python。language 都係其次，其實返工既日子一點都不容易，起初返星期一二四，每朝就要5點起身，5點半出門口，一直揸到8:30 泊好部車返公司，我有試過遲一點出門口，但入城超過8點就好塞，所以早啲返公司。放工好彩唔塞車的話7點零就返到屋企，唔好彩試過塞車8點幾先返到。每日5點一直到8點，back to back星期一返完星期二再返，都咪話唔辛苦。

好多人話唔鐘意英國既冬天, 因為日短夜長，冬天朝早8點先天光，下個3、4點就天黑，返工日子真係由天黑揸到天黑，depression 一定有，唔慣都一定，但好彩既係老細好人，佢又請到成條team 都係香港人（BNO visa 剛出了），我圍爐圍得開心，老細佢會頂，佢handle 既手法都好香港人既手法，logical and making sense，所以返工係辛苦但我都感覺值得。一個成功既leader 係會不著痕跡地令到下屬去甘心拼命，正所謂得民心者得天下，而民心之所向係自願而非自講自說。因為圍爐同要返office 既感覺，工作時都係用廣東話同國語多，令我更似回到香港時候。

講到同台灣team 夾，我曾經有種憧憬，台灣最美的風景是人情吧，但接觸過呢度既台灣team 就唔係呢種感覺，唔通真係好似日本咁，永遠去旅行去消費係最好，但講到去搵食，日本工作文化做到過勞死同階級觀念唔係人人都接受到。講返同台灣同事夾，當中那邊已有一個做左幾年既台灣engineer, 一黎就起晒「剛」，問親野就耍太極，但樣樣就霸住黎做。事實上我都算係職場上打併左十幾年既old seafood，唔通我唔知你想點咩，職級上我老細係騎住成條台灣team, 我哋又人在英國呢邊，台灣只係support 性質，好自然老細都想將台灣既野慢慢shift 返晒過英國，台灣又有時差，英國時間上support 返公司都好正常，但就因為呢個舉動令到我哋同台灣team 正面交鋒，即原來港台矛盾原來一早已發生，仲早過在台灣處理香港移民上，一場職場矛盾即將展開，作為old seafood 既我應該點樣避呢？

第八章：心繫祖國，決戰台灣？

英國team 同台灣team 既對立愈來愈明顯，我老細本身title 大過台灣，也想慢慢轉移台灣所負責的過來呢邊負責，但台灣team 本身做得比較耐，好多野都唔放手比我哋去接，佢哋要成好多野其實都仲要依賴台灣既假象，當中攪到好混亂，好多政治手段，但其實做左咁耐野我老細都足夠經驗同佢地玩，總之就係佢哋霸住唔放仲不斷請人好似好多野做咁。之前我老細在英國呢邊愈做愈有起色（加上我既幫忙麻 XD），大老細係一個英國白人，佢話唔喜歡本地人效率太慢，加上亞洲人計數快啲，叫我老細直頭經香港agent 請香港人經BNO 過嚟呢邊做，所以得到指示下擴充到成條英國data team 都係香港人，圍爐取暖之下我好似返咗香港工作咁，一星期三日返office，食lunch 時都會買外賣返去食，公司有Pantry 食飯地方，慚慚地我哋被人投訴太大聲圍爐得太勁，可能太多香港人圍爐講廣東話太揚了。感覺公司其他人都開始邊緣化我哋。另外，在家工作既日子會比較輕鬆，其中有一個香港人可能在家工作太得閒，去咗行山（懷疑），因為我老細話收到投訴，公司網上保安team check 到那位同事全日隻mouse 都無動過，換言之公司係有監控每個同事，我後來查到原來公司安裝左類似spyware 既監控軟件去monitor 住每部電腦既mouse, keyboard 同internet 流向，基本上你係部電腦打任何字都會查到，令我心寒既地方係點解遠在西方都會有呢啲監控？我唔知公司咁樣做犯唔犯英國法律，也唔會懷疑英國人玩法律條文既能力，但咁樣令我更加感受到我已心繫祖國，富有新時代特色主義既工作環境下做野，真心感覺唔好。令我開始有種當年法國仔問我係唔係每個香港boss 都係咁bossy 既感覺，係唔係間間英國公司都咁樣監控員工呀？要每日身處監控之下做嘢，咁我做咩咁辛苦去英國？早在我既出生地已經擁有啦。有時原則問題下收入已經唔重要，有啲嘢我接受唔到就係接受唔到，去到邊一個國家都一樣，當一刻已經產生去意，如果唔係我上司仲係度做，我真係有種沖動遞信，反正咁早返工又咁長途車程，返得耐身心都累。

公司針對香港人圍爐既情況愈來愈明顯，開始好似工廠咁每次返office 要打卡監控進出時間，老闆娘（台灣婆）開始對我老細有微言，唔知係因為圍爐事件定我地決戰台灣佢唔like，另外更安排internet security team 坐正我哋後面，我都試過幾次忘記lock 電腦比人投訴，那種監控法真係好離譜，我起身去廁所，行出去半路中途記起未lock screen 行返去lock，過程應該一分鐘內，咁就被人投訴，十足十big brother is watching you 英倫版，唔通圍爐既代價就係被祖國式監控？

本身全條team 本身得我一個engineer，老細話由香港請多一個engineer 幫手跟project，公司本身做埋房地產生意，公司會安排住屋housing allowance(我上司都係住housing)，所以新請返黎既engineer 一家三口就先落腳公司housing，初黎報到感覺佢份人幾nice，佢叫保怡Bowie，佢就係咁在未知情既情況下加入呢條兵荒馬亂既data team...

第九章：香港人被清零，被的走既無奈

保怡初黎報到一個星期，都開始感到呢度戰火連連，明顯地佢都感受到氣氛唔好，成條team都好似被針對一樣，一個星期後既星期一，我如常一早8:30 返到office, 比我見到我老細企係門口等，我同佢講早晨都無表情，返到埋位見到大老細執緊我老細張怡！唔通佢都被人強制的走？連門口都唔比入？

保怡見到後問我咩情況？當時我同佢兩個既表情應該都係只望一個方向呆左，比唔到表情，同那二十個人一樣，想探一層佢全家移民返左工唔夠一星期，直屬上司就被人的走，仲要唔比入門口那隻，究竟佢犯錯左咩事被人炒到連門口都唔比入做到咁絕？好難怪佢唔知間公司咩料，

上司被的走既呢一個星期，人心惶惶，大老細無講原因，估計一定唔關做嘢事，咁我就懷疑因為同台灣team 權力鬥爭下失敗既一個。英國 (HK) team 開始弱勢，同時間隔離team 既香港人PM 都被的走，令人開始懷疑係咪要清零香港人？

在戰戰兢兢既情況下人人自危，最慘係剛黎到既保怡，佢只係同上司合作左一個星期。又簽咗約如果一年內離職要賠錢，所以佢都無得走，另外上司本來住緊公司提供嘅housing，即係宿舍。而家佢被的走，公司要求佢兩星期內搬走。佢成家要立即搵屋搬，當時真係局外人都感受到人情冷暖。上司個位臨時搵左個後生仔頂上，佢都係香港人，佢同我講佢想上因為想儲多啲錢係呢邊買到樓，矛盾既地方係呢邊搵錢扣完稅真係無咩剩，真心要儲錢香港搵易好多，我同佢既取向唔同，我既打算係想向技術層面發展，管理層要多溝通，技術要求反而比較小，溝通同人哋打交道始終比本地人差啲，佢英文又係正宗香港英文一舊舊，我只有祝福佢。

講返搵工，我做呢行其實唔擔心搵工，如果唔係上司，又咁遠路程返工，我可能一早頂唔順resign, 經歷過咁多野其實都只係做左一年，就係剛做滿一年後我就resign, 因為我有一個offer 在手，雖然係做consultant 公司，做左咁多年都知道做外判公司通常都係比晒d 麻煩野你攞，in house 同事就印印腳慢慢做，不過我當時都唔理得咁多，但求可以remote 在家工作唔使再搵長途車就ok 了，離開呢間監控員工既公司之後，我先感受到呢間公司係一間異數，條team 陸續有香港人搵到工就走，大家都知咩事，只有那個剛上位既後生仔似乎好享受剛剛lead 一條team既感覺，身為old seafood 既我當然識做好來好去，事後證明人既關係都好重要，從中會幫到人也幫到自己

第十章：出外發展，強勢回歸？

轉戰第二間公司，終於脫離被監控的日子，新公司係一間consultant 顧問公司，簡單講就係指派去其他客戶公司度執屎。所以人工理應比其他做 in house 既公司高，我過去也只係輕輕加左10%。其實執屎程度有高有低，但呢間公司有啲伏，事緣當了解到要負責既工作後，我覺得除咗執屎無野可以形容，客戶公司本身data team 有十幾人，佢哋每星期都出release 更新改版本，但又唔多做debug, 可能只做各自既unit test 但又唔做integration test 咁啦，所以導致到好多時分開行得走得，一夾埋成個workflow 就唔行得，我哋負責既工作就係當每日行既data workflow 唔行得，error 彈出嚟就要即時debug，resume 行返好佢，好多時要即時patch data 都唔在講，難就難在要每朝6 點起身monitor 住個workflow，之後祈禱希望今日行得順順利利，務求要9:00 前完成，萬一出左咩事就要即時fix，其中最難係因為開發同改動都唔係你負責，但每日要求我朝早9 點前fix 好，呢樣野好伏，因為我係唔會清楚十幾人改過咩嘢，要追番佢哋既change log 同準備第二日既bug fix 就係我全日既工作，呢種咁無意義又唔健康既開發工作真係難攪，過咗一個月已經開始後悔會唔會太倉促決定呢份工。

作為old seafood 既我同舊公司一直打好良好關係，之前被的走既前上司也一直有聯絡，始終香港人幫香港人麻，舊公司一直都搵唔到人replace 我個位，也搵過我返去，但我實在唔想再每次都浪費五個幾鐘頭揸車來回office, 既然佢哋請唔到人，我就膽粗粗問一問條件，可唔可以人工同我宜家一樣 (+10%)，work from home 唔返office，另外我係想離開呢間監控員工既變態公司，所以我想用合約形式合作，結果居然無問題，而且仲可以用公司形式合約，即我可以開一間私人公司同佢簽約提供該職位既服務，好處係更自由，公司抽既稅項比個人所得稅平，仲有工作相關開支都可以報銷免抽稅，而且我提供既服務唔一定係由我去做，可以係我公司既其他員工。由此，我就回歸舊公司，也開始左我另一種職場身崖，另一種定位同職場生存睇法！